

四庫全書

集部

欽定四庫全書

集部
梧桐集卷
四三

詳校官編修臣翟槐

中書臣劉源溥覆勘

總校官進士臣楊懋珩

校對官助教臣胡予襄

謄錄監生臣馬步蟾

欽定四庫全書

梧岡集卷三

明 唐文鳳 撰

五言律詩

進臘日詩

大蜡逢嘉節，陽和暖欲回。
人間恩惠溥，天上早春來。
臘意風催柳，寒香雪沁梅。
梁園應預宴，授簡效鄒枚。

又

臘日饒佳景乾坤萬里同三農方報祀八蜡已成功鶴
禁春光早龍庭喜氣濃太平端有像願勿效東封

洪武庚辰八月一日為撫安人民至衣錦鄉訪
安湖書院拜先聖殿謁先賢祠棟宇傾撓廊廡
荒蕪顧瞻感嘆念欲興修茲焉經始以俟畢工
歷初十日夜坐絜矩堂新月滿庭謾爾興懷成
五言近體十首時儒生鍾民敬亦次余韻以紀
一時之清興也

涼夜坐長廡披衣酒半醒月涵雙沼白雲去萬山青遺
老猶文物前修尚典刑我來勤撫字短髮故星星

又

昔號懷珍士今游衣錦鄉三程祠尚在二謝塚應荒儀
範崇昭代功勲銘太常自慚居邑宰弔古意何長

又

天地有否泰山川無古今相傳舊時政應慕昔賢心三
獻曾悲玉四知常畏金平生無寸術一念恤民深

又

三桂雪霜古孤槐風雨黃
昔賢祀宇在先聖殿庭荒壁
刺藤枝小墻垂草蔓長愧予
同政教感慨意徬徨

又

夜坐庭前月娟娟影倍清
眼看前代迹心切故鄉情
積水魚龍起空林鳥鵲驚
靈槎如可覓吾欲上蓬瀛

又

昨日又今日千山復萬山
道途常畏險身世每思閒
有

役吟情澁無憂酒量寬一官聊自慰未必悞儒冠

又

問月月不答留雲雲自行江山應有待天地豈無情蒼
狗形須變青鸞影更明一杯聊復爾漫聽浩歌聲

又

不盡吟詩趣徘徊欲二更亂星浮酒甕孤月煮茶鐺此
夜朋徒興他鄉兄弟情平生仗忠信撫事不須驚

又

得酒曉仍飲尋思夜更哦人心應復爾吾道竟如何蟾
影一池靜蛩聲四壁多百年斯道重未用歎蹉跎

又

問俗經村落周行途路難端嚴元有道澹泊若無官報
國寸心赤憂民兩鬢斑位卑才更拙誰為達朝端

和游新吳寺詩韻有小序

雲幢海上人來自西昌手新吳寺詩文一帙有
杭府通判楊自立所作小序同游諸文士分韻

賦詩以黃葉前朝寺為韻成五言體五首囑余
和之愧不自揆勉短續貂以繼楊公諸游士之
清興云時洪武壬午冬十一月也

步屨響迴廊庭虛月一方
梅檀雲弄影蒼蘊夜吹香
禪定猿窺鉢經殘鶴護房
明朝覓歸路滿地葉飛黃

右黃字

招提境清幽小徑縈曲折
登高目可舒攬秀意猶愜
石壇花雨飄琴室松風歇
向晚偶題詩寫遍寒蕉葉

右葉字

默經白馬寺創額赤烏年宗續雲門法心參雪竇禪松
高留鶴語樹老蛻龍懸長日緇經罷蒲團禮佛前

右前字

倚杖閒尋寺吟詩忽過橋晚山含雨暗秋水共天遙自
媿花封治難從桂隱招婆婆遊世界鐘鼓樂清朝

右朝字

涯洲地幽深尋僧聊小憩名山在寰區勝境異人世澗

寒龍已歸村深虎初逝上方鐘磬聲疑是雲門寺

右寺字

萬安縣

小小萬安縣潺潺惶恐灘江流章貢水地接吉筠山產
薄賦應少民稀政自閒為言趙大尹解任幾時還

時趙彥剛

為本縣
令考滿

永和鎮

宋丞相益國公必大家是鎮有窯場燒磁器公生後器不能成猶存讀書臺

永和古名市益國是家鄉窯變胚胎器街存瓦礫牆山

川奪秀色天地啟珍藏寂寞書臺在茫茫春草長

螺子山

山名螺子小蒼翠欲參天勢壓崆峒外形凝混沌前琳宮浮紫氣梵宇出青蓮吾欲投簪綬歸耕老石田

吉水縣

邑號古西昌相傳文物鄉栽花令尹宅擢桂狀元坊江瀉吉文字山凝秀色蒼曉來春雨霽新綠柳絲長

清江鎮

鎮市清江上居民棟宇連淮鹽堆客肆廣貨集商船草
色春迷地波光暖浸天凌晨征棹發萬竈起炊烟

豐城縣

小縣枕江濱人家柳色新斗牛空紫氣天地已青春士
俗猶追古民風頗化淳文安今寂寞千古老儒臣

元學士揭

文公曼卿故鄉

徐孺子亭

遺趾在東湖

高士亭今廢遺基俯碧流聲名著東漢人物重南州友

致生芻蕘賓延下榻留平生惟食力祿仕豈曾謀

望湖亭

一上望湖亭湖山四面青天開浮碧落水濶接滄溟蛟
窟人懷懼龍祠客乞靈老年思補報短髮憇星星

落星石

女媧曾煉石上補列星躔遺質傳千古流光下九天龍
文猶照日虹氣欲生烟水落年年在西風幾泊船

湖口縣

萬里長江遠扁舟一葉孤山連彭澤縣水接洞庭湖客
市魚堪買人家酒可沽丹心頻念闕指日到皇都

湖口觀音閣

傑閣枕江滸登臨為落帆天開兜率境波浸補陀巖僧
設伊蒲供經翻貝葉函村醪澆旅况吾欲典春衫

彭澤縣

欲問柴桑里來尋陶令家菊香無舊蝶柳色有新鴉雲
淨浮青嶂潮回擁白沙縣街今寂寞酒貴不堪賒

馬當峽夜泊

夜泊馬當峽潮歸龍起風往來千里外辛苦五年中每
歎零丁客多慚矍鑠公天空明月出故故照孤蓬

佛指峽阻風

佛指喜名峽客心驚阻風江山應有待天地更能容民
俗思遺愛臣心秉至公老年頻念闕矯首五雲東

再留佛指峽

昨日雨猶少今朝風更多江吞大信水峽束小孤波萬

事古如此百年今若何
明當發征棹沽酒一高歌

佛指峽舟中見月有感

長江夜景沈風急掃頑陰
鳥鵲高枝穩魚龍積水深
月藏萬古魄人老百年心
抱膝閒吟罷羈懷苦不禁

又

去縣離百日思鄉隔萬山
民心應久望月色自長閒
江隱蛟螭窟天開虎豹關
姮娥如有意清影照蒼顏

又

阻風愁不柰見月喜何如蟾影涵蘇魄龍光燭太虛斗
間覘紫氣頷下現丹書桂闕羣仙降天香拂袖裾

又

三日留孤峽風狂濁浪高寸心馳去楫微命托輕舸阿
閣來儀鳳神山載巨鰲五雲天闕近朝罷謁銓曹

又

來日當殘臘歸期及暮春眼看今夜月心切故鄉人浪
息煩風伯舟安托水神馮唐何用嘆未悞百年身

離佛指峽

空傳佛指現不念佛心慈怒浪排空猛驚風入夜癡峽
青花雨墜江碧柳烟垂此地稽留苦主程敢後期

泊雷港有作

大江風浪急雷港暫停舟桅直黏雲立帆輕帶雨收葦
蒲連浦淑揚柳暗汀洲每羨漁家樂謀生不外求

又

雷港沙堆浦春江浪拍空一時潮信雨三月石尤風飛

退無來鷁歸遲有去鴻故鄉朋舊在何日酒尊同

又

昨日又今日百年能幾年暮雲青峽雨春水白鷗天
宵戚歌牛下昌黎拜馬前平生恁流止志氣肯祈憐

又

晚泊豁吟懷行行步渚沙雨添新柳耳水減嫩蒲芽
鳥鬼來漁艇青蚨付酒家微風吹短褐倚杖數歸鴉

又

舟子行舟緩淹留十月程人心誰會意王事我關情風
暖江波定雲晴浦月生故鄉何處是迢遞望徽城

橫石磯

橫石倚漁磯狂風浪激飛山頭雲覆帽地骨草成衣城
繞江三面天連水四維人家柳汀上沽酒賣魚肥

吉陽鎮

吉陽傳舊鎮巡徼復新司燒券不我責棄繻當自期江
空雲窸窣天濶雨絲絲宵謂吾衰矣心猶少壯時

雁汭

小河流雁汭巨浸接龍灣
碧瀉九江水青迎兩縣山
老添新白髮愁減舊紅顏
酒助詩神壯揮毫思不慳

長楓峽

篙師用力健帆駛拂雲低
浪湧長楓峽沙平短柳堤
雨輕魚性熟風暖鳥聲齊
酒醒詩成後蠻箋手自題

拏槳石

亂石累堆小嶺巖高丈尋一
拳浮水面千古鎮江心
鸛

鶴棲巢穩蛟龍宅窟深晚來閒極目獨獨自長吟

馬踏石

何年天馬下踏碎石紛紛跡印滎河種蹄奔沙苑羣深
涵三月浪亂點一江雲晚泊維舟處微風酒半醺

池口鎮

迫暮宿池口維舟艤渡頭城依孤嶂聳水入大江流市
小無鹽肆年飢有米艘人生忙底事閒殺羨沙鷗

又

驗券巡司下停舟水驛前
遠山常隱霧巨浸欲吞天
小市魚蝦集長汀鷗鷺眠
旅情何太苦搔首意茫然

梅根市

寂寞梅根市潮回岸擁沙
柳邊維客艇樹底著人家
山暝雲含雨江晴水映霞
曉來篷下坐開鏡整烏紗

六百丈

地長六百丈江濶一千尋
章亥足曾步玄夷夢未臨

禹祭

衡山夢玄夷蒼水使者得金簡
玉字乃得治水之要出吳越春秋
山川古域在歲月逝

波深自是操吳語何煩效越吟

銅陵縣

五世祖唐廷瑞宋理宗朝登科仕銅

見說銅陵縣相傳我祖風
抱經曾擢桂授職已哦松
水木情何極江山興不窮
文孫事尋訪父老指遺蹤

舟過銅陵得風

累日逢狂浪凌晨得順風
舟輕如駛馬帆快若征鴻
鼻祖政猶在文孫道未窮
南京天闕近王氣鬱葱葱

晚泊神福鎮

鎮有將軍廟徐君幾代孫操戈忠更切挂劍誼尤尊雖
享千年祀難招百戰魂神靈頻錫福落日大江吞

又

古鎮名神福將軍有廟庭水光浮日白山色隔江青魚
化長生浪鷗驚不下汀丁寧一盃酒此地慰漂零

又

生居治平世老遇聖明時日月無私照江山有後期潮
痕添雨見花信得春知晚泊吟眸豁微風颭鬢絲

又

水暖沙堆浦江深浪激磯柳花黏燕薄蘆笋薦魚肥事
業方從拙生涯計任非懷忠慚食祿應哭泣牛衣

荻港

小港紆平岸長江捲怒濤人心鼠投穴我志鶴鳴臯陰
靄村墟隱悲風日夜號持衡頻考績清裁屬東曹

版子磯

分港殺波急突磯攢石多天寒吼犀兕浪暖鬪蛟鼉東

海鞭難塞南山叩更歌年年形勝在人世幾經過

月子河

天近星姑渚

黃姑織女星也星名黃姑故曰星姑蜀有黃姑渚

江分月子河磯

頭蹲虎石沙背漾鷗波白水連淮濶青山入楚多往來
無阻險鼓枻一長歌

月子河午泊

河口初停楫江心又挂帆水光搖去旆雨氣襲征衫薄
俗空騰謗清朝肯畏讒神祠千古壯高倚石巔巖

三山鎮

鎮挹三山聳江通二水流驚濤捲地起怒吹挾雲浮投
檄昌黎伯乘槎博望侯平生遠遊志何日到瀛洲

三山順風渡江

三山離鎮遠一棹渡江來月出鮫人泣潮歸龍子回持
心絕思慮撫事去驚猜向晚情何適詩成句穩裁

螃蜞磯

小小鷓鴣艇團團螃蜞磯客帆朝落影漁火夜藏輝圩

潤稻梁熟汀長蘆葦稀江鄉如可隱吾欲問東歸

和尚港

人傳和尚港春水沒漁磯不見浮盃渡空聞飛錫歸
魚三月美螃蟹九秋肥惆悵玄真隱衰年與願違

魯港

魯港停舟處相逢故老談河魚時潑刺江燕又呢喃
帶雨張帆腹臨風拂劍鐔百年董狐筆憤死木綿菴

臬磯

宣城誌載廟祠昭
烈夫人孫權妹

拳石聳江中波流四面同今傳神顯異昔詫女英雄巴
蜀經營遠荆吳割據通魂歸思故國不祀永安宮

蕪湖縣

蕪湖舊名邑官廨幾經年鼓響來祠下舟行到縣前江

花寒泣露浦樹暖浮煙遙憶祁陽尹同宗賴汝賢

姪彥禎登

洪武己卯科進士第授湖廣永州府祁陽縣知縣

東廊山

山聳號東廊蜿蜒龍勢長地連春水白天入曉雲蒼日

月經旋遶乾坤接混茫欲尋謝安樂著屐此徜徉

西廊山

高聳遙相並東西勢自分常飛兩山雨只隔一江雲
韓子登長慟愚公移未勤舟中幾回首蒼翠倚斜曛

晚泊大信

大信維舟泊炊烟暝色迷水光連上下山勢隔東西
江接淮淝近天分吳楚低人家多賣酒旅客醉如泥

贈蕭飛霞老道士

白髮保修齡神全體自寧上清留紫府內景誦黃庭佩
劍龍來仗吹笙鶴下聽旌陽傳秘術符篆亦通靈

贈栢仲芳

弟子昔承教先生今隱居白頭在閨閫彩服立庭除千
里形神隔三年音問疎相思函丈側涼月夜晴初

又

相思長北望相別近南遊京國鶯花雨江湖蘆雁秋李
生師說在栢子隱居幽安得陪清講爐香細細浮

書示次兒禎

七載從遊宦勤劬孝念深關山千里月父子一生心老
驥思長道啼鳥戀故林鄉書何日到遙望白雲岑

又

老作王門客栖遲兩鬢霜長孫憐稚弱慈母喜康強寒
沼魚堪膾春罌酒可嘗昔年新種樹別後過人長

又

吾家五兄弟儂指恰三人骨肉生無死光陰秋復春家

山千日酒宦海百年身幾度思先壠寒風淚洒巾

又

我去驅車北兒歸返旆南頭寒宜戴帽髮短不勝簪詩
律吟餘穩羈懷飲後酣平安數行字一劄手初緘

又

父老已如此子歸將若何乾坤饒雨露風雪阻關河花
縣民情切楓宸聖澤多涓埃期補報吾道肯蹉跎

又

弟昆心自切父子誼尤真日月千年曉乾坤萬物春角
聲催去旆帆影候歸人送汝京華道澆愁酒味醇

又

去馬策未數行舟櫂莫停客愁雙鬢白家學一燈青肯
嘆彈新缺何憂守舊經嚴城寒柝夜殘酒夢初醒

又

瘦妻飲憂恨弱女憶嬌癡旅況天難管愁心客自知鴈
賓來北渚菊老醉東籬惆悵陶彭澤田園有所思

又

嗜慾心如水文章氣比虹青衫蒙帝澤彩筆奪天工
肯嘆龍鍾叟猶誇矍鑠翁時明當際遇道在豈終窮

又

北雪馬如蝟南人貂作裘自諳為客況莫動念鄉愁
子母錢神在雌雄劍氣浮董生繁露筆寂寞著春秋

寄內

恩賜王官俸封題寄老妻關河異南北形影各東西
離

曠孫留贅嬌癡女在閨傷心安義命收汝萬行啼

用鍾伴讀清明節燈下書懷韻

客裏愁無柰生前樂有涯頭風愈擻草眼月眩燈花泛
泛清江艇悠悠紫塞笳不須懷故土隨分酌流霞

又

鄉書來日下老客在天涯冀北千家酒江南二月花旅
愁彈短鋏歸思動清笳悵望松楸處黃山隱暮霞

又

鄉心歸有日愁思浩無涯
寒食家家雨清明處處花
細書裁短劄老淚滴悲笳
望遠孤飛驚天邊伴落霞

又

雲鎖佳城處巖溪碧水涯
翠珉悲沒草彩筆夢生花
牧子風前笛羌人塞上笳
傷心留異土歸思繞烟霞

又

生長南山麓羈栖北海涯
人情輕柳絮客夢瘦梅花
遣興乾春甕吹愁咽暮笳
何當問丹訣修煉欲餐霞

題率濱亭

休父蕃遺裔高亭俯率濱漁樵終隱客耕讀太平民
柳暗清溪雨花明碧嶂春何當謝塵鞅僦屋結比隣

又

亭枕率溪水高人時往還自甘心跡靜未嘆鬢毛斑
雨暖跳紅鯉風涼下白鷗優游忘世慮拄頰飽看山

又

海濱歸大老率土仰明君未賜鑑湖曲空傳盤谷文
渚

花紅作雨沙鳥白為羣安得亭中坐溪雲半榻分

又

坦率忘機事長懷古樸風徒傳遇圯上何意卧隆中詩
夢空飛鶴文光尚吐虹百年訪遺迹雲散野亭空

又

翰墨前朝老詩書後代孫蘿山近排闥率水淺當門地
寂名猶勝亭空扁尚存揚休能索詠此意許誰論

奉賦野索馳

并引

六月三日甘肅進野索馳形小而力健能日行
五百里羣臣獲觀命賦詩以進

性野何能蓄形龐自不羣遠行五百里重負一千斤
羸寒沾雪峯高暖積雲從今歸惠養效力肯辭勤

奉賦蹇驢

蹇驢自堪策應是駟驢儔緩轡小橋雪長鳴伏櫪秋
謫仙曾跨步杜老每追遊黔產無他技文傳柳州

秋曉陪駕出獵用鍾伴讀韻

鷄鳴戒早炊曉日起嵎夷風力寒侵骨霜華濕點眉招
旌心望切侍駕步行遲獲鹿歡聲動三軍得雋時

進賀千秋節詩

甲申十二月十六日

明朝遵祖訓趙國錫王封宗社藩維壯山河表裏雄祥
光惟嶽降壽筭與天同祚肩千年盛貞符萬世隆成功
勞汗馬啟運翊飛龍鶴駕神仙府鸞笙帝子宮春回十
日後是月二十七日立春星拱九霄中暖沁梅香潔寒消燭影紅
璽文金燦爛珮響玉玲瓏願效長生祝常瞻不老容獻

圖來閬苑問道向崆峒善頌慚無補丹心效寸忠

七言律詩

前元至正十四年間庚申帝遣使謝嘉卿航海
齎名幣法酒至徽州歙縣徵師山隱士鄭玉子
美授以翰林待制時端本堂正字鄭彥昭啟東
宮侑以尚尊後辭不赴召值兵變所賜幣流落
民間迺購得之余以舉保授興國縣令考滿入
覲遂裁製為衣以朝天闕感前代之恩幣成聖

朝之品服謾成七言律一章以寄意云

剪就天機雲錦章銀絲萬縷日爭光
應酬晚節冰霜志猶帶前朝雨露香
袖拂苔痕封印匣袂聯棠影上琴堂
三年製錦朝京闕衣繡終當歸故鄉

江東廟

山繞川迴形勢雄神靈祠宇枕江東
灌嬰已受平蠻策石固應成佐漢功
大業沛豐今已寂遺恩章貢久猶隆
故鄉燈火黎民樂祀饗春秋永不窮

出水寺

梵刹巍峩知幾年上方樓閣出雲烟
天開兜率無雙境山湧空同第一泉
惠遠白蓮期入社陶潛黃菊願歸田
三生石上精魂在月照心清悟夙緣

鬱孤臺

峒窵百尺鬱孤臺境占清高烏府開
山聳空同連地起水通章貢抱城來
東西日月環雙轂今古乾坤小一盃
翠浪玉虹依舊在題詩誰繼大蘇才

考滿舟經十八灘

種就河陽花縣春此行考績覲楓宸
三千里外思鄉客十八灘頭遊宦人
直節文山真大老速歸儋耳舊詞臣
二公昔日曾經處苔石斑斑篆刻新

峽江

崖裂龍門來峽江怒流不逞勢
春撞蜃樓雲結飛汀雨鮫室風生
散石瀧天地古初開混沌山川形
勝壓鴻龐酒醒夜看篷窓月餘韻
嗚嗚換笛腔

洪洲

洪洲如纜繫洪都浮筏成形壯地圖山接崆峒連兩廣
江通彭蠡入三吳水寒秋井潛蛟伏波暖晴沙去鴈呼
寶劍騰空何處覓中流石柱倚雲孤

滕王閣

滕王高閣倚晴霄十二欄干近斗杓國土藩封存故典
山川形勢拱中朝三王文壯虹光吐五老天開雲氣飄
懷古登臨興何已新紅酒熟注春瓢

吳城山祠讀蘇東坡石砮文

篆隸字
刻石

僖耳歸來思不羣衣冠洗盡瘴烟氛質堅已出龜鼉窟
制古猶存蝌蚪文肅慎遠遺知後學荆梁入貢記前聞
摩挲石刻沉吟久漁笛聲中日又曛

石砮坡翁自南海歸至祠下徘徊於湖濱得之人
爭傳看隨失水中沒使人一探而復得遂留祠中
過安慶弔余左丞

龍飛淮甸渡長江抗守孤城死宵降一士忠貞傳左轄

百年神武定南邦
杲真兄弟時稱獨
巡遠勲勞世少雙
褒寵聖朝崇廟貌
巫歌覲舞降神幢

安慶城

大江萬里怒流長
環繞堅城接混茫
地控江淮入吳楚
水通巴蜀滙荆湘
雲連瀛海浮仙島
天近神州壯帝鄉
千古忠魂何處覓
下招誰為遣巫陽

偽漢兵攻安慶元左丞余闕守城不

降死之國朝旌其忠節立廟賜額至今祭祀

過池州

東南浩渺大江來
山到池陽地勢開
十里烟雲迷雉堞
百年風雨護龍堆
居官自乏中年政
濟世應無太傅才
老我登高尚能賦
何煩授簡效鄒枚

斗湖為道人謝玉林賦

半湖秋浸斗來寬
彭蠡小龍時往還
仗劍驅雷翻水府
焚章乞雨達天關
雲凝石髓朝流汞
月漾驪珠夜吐丹
吹醒一床池草夢
却隨仙侶跨青鸞

送訓導陳公餘之筠陽

今瑞州府

一經薦剡授官迴司教臯比講席開久聚德星傳世業
好施化雨育英材江通文水清澈底山到筠陽翠作堆
九載考功多擢桂天香高折數枝來

又

公餘父陳仲述
任監察御史

六籍窮探仔細看太邱家世弟昆難先生此日臯比席
御史當年獬豸冠自是青春司教職肯憐白首老儒官
西風黃菊筠陽道吟得新詩字字安

送徐布政之廣東

寵恩授職喜超遷慶錫綸音下日邊東廣東釣臣宰重
南州傳譜子孫賢五羊化石留千古一鷄橫秋上九天
朔雪炎風總王土聖明德治在承宣

題江山獨步圖為地理白彥奇賦

乾坤如此好溪山獨步高人自往還龍駐盡時蒼石露
牛眠深處白雲間邱原遊覽情何極風月吟哦興不慳
他日汝川川上路青鞋布襪訪松關

安隱堂為秦遵道老人賦

安隱堂中七十翁
龐眉鶴髮古人風
高名不減韓康伯
厚澤應同龐德公
稚子趨庭鳩杖出
嘉賓滿坐蟻尊空
賜歸得遂桑榆暖
擊壤堯民樂歲豐

和伴讀鍾啟晦贈劉淵然高道詩韻

乘風欲訪羽人邱
道骨仙姿第一流
壇上熒光宵禮斗
匣中劍影曉橫秋
姓名久達黃金闕
品籍應居白玉樓
聖代只今崇教典
何煩紫氣出關浮

送僉憲武本大之官閩南

拜命新除被寵光
觀風持節鎮炎方
三山恩煦繡衣日
八郡威凝白簡霜
冰盃沉紅嘗荔子
曉盤摘綠薦檳榔
聖朝求治蘇民瘼
宥讓澄清說范滂

送大尹之官房縣

房陵山水繞郊墟
令尹新除甫下車
耆舊好尋高士傳
交遊為寄故人書
千家桃李春風後
百里桑麻夜雨餘
共說廉平宣治化
細詢民瘼定何如

和伴讀鍾啟晦雪中景春指揮留飲詩韻

東風一夜散瓊花春滿皇都貴戚家
簌簌寒聲蠶食葉
瀟瀟細響蟹行沙
飲餘醇酎顏常渥
吟得新詩鬢欲華
晚跨驕驄歸甲第
開尊宴客泛流霞

題古鄆湯潤珉菊庄

東籬處士舊開徑
東澗先生新作庄
白髮自憐今世老
黃花猶惜昔時香
百年清興留詩句
九日高情付酒觴
我欲賦歸歸未得
秋風吹夢故園荒

題畫馬

房星墮地夜流光却向滎河產驪驪雲霧氣蒸疑鳳翥
風雷勢激若龍驤九千道里來神異十二天閑得俊良
好語奚官勤洗刷鸞輿穩駕御堦長

一駿能空萬馬羣貳師窮遠豈曾聞影孤不踏瑤池月
氣逸將陵玉宇雲首買千金來駿骨隊分五色雜龍文
同州沙苑春風早豐草烟青牧養勤

驕姿不肯向人嘶逸氣稜稜迅步遲寶勒緩牽芳草雨
錦韉輕污落花泥九衢風掉青絲尾萬里雲生碧玉蹄

妙畫只今神變化龍光夜夜貫文奎

寄四弟子彰

巖溪溪上呂家林廬墓年來宰木深雲冷九原今古恨
月明千里弟兄心白鷗眠渚閒馴性黃鳥迎風送好音
為問東籬叢菊在相思幾度動清吟

程母朱氏亢節守志壽躋百歲李雪菴為書壽樂
堂崇節堂六大字以昭山窓先生之遺澤二子白
玉君玉復扁其樓曰朝陽曰拂雲其孫成得請予

記之乃詠次四詩云

壽樂堂

壽樂堂中白髮親生存強健百年身
嫠居月苦青帷夜笑語風和綵服春
諼草欣榮衛國詠大椿
憔悴漆園人雪庵字畫題華扁射斗虹光筆有神

崇節堂

崇節堂中婦德全豈期偕老不齊年
蕭蕭白髮青霜肅耿耿丹心白日懸
身比瓊瑤應共粹志如金石自同堅

玉堂有與書貞節史筆當今繼馬遷

朝陽樓

朝陽樓外楚天東霞捧瞳瞳曉日紅弱木金雞飛蹉蹉
茂梧丹鳳語羅羅關弓后羿留孤轂緩轡羲和御六龍
下土小臣仰餘照四時佳景駐春融

拂雲樓

拂雲樓外萬竿齊直幹森森接漢低春雨百年龍未化
秋風五夜鳳來棲渭川波漾清陰轉將遲雲拖翠色迷

昔日凭闌今遠去詩成幾度寄留題

九日遊慶壽寺

出遊九日訪招提步屨秋風信杖藜聞有紫莖芝產秀
想多黃蕊菊開齊閤官真隱陶彭澤內史清名王會稽
老衲已無心跡累自慚待漏聽朝鷄

偕胡伴讀訪繼上人

偶逢嘉節試同遊古剎黃花九月秋蓮社陶潛應有約
莫囊桓景不須求乾坤容我襟懷壯光景催人歲月流

為問麟經家學在相期二老紹前修

為訪高僧浣俗緣黃花香寂晚秋天杜公詩句稱支遁
韓子書辭慕大顛嗜酒許開彭澤戒喫茶應悟趙州禪
法華讀罷心如水方丈香浮一篆烟

二月二十日得家書

喜得平安一紙書欣然頓覺客愁除四千道路雲山遠
六十年華雪鬢疎肯羨腰錢騎有鶴不須彈鋏食無魚
丹心報國忠誠在老我王門日曳裾

三月一日夜夢歸家

十年宦寓在天涯此夜徐徐夢到家
形幻春風輕柳絮神清寒雪瘦梅花
歸心未逐河邊棹旅思頻驚塞上笳
依舊黃山千丈月蘧蘧飛蝶悞南華

憶二弟

愚兄文學人皆似二季才華世共推
旅思何如鄉思好少年那比老年衰
江南春雨青燈夜塞北寒雲白雪時
杳杳空傳鴻鴈字悠悠長賦鵲鷁詩

寄萬松道士程宗吉

少年卜築棲稠樹老境投閒隱萬松月白黃山騎獨鶴
風清紫府佩雙龍平生物外交情厚異土人間旅思濃
何日歸田共還往秋雲步穩一枝筇

春菴楊紀善見子之喜有詩次韻奉賀三首

乏嗣承宗亦可羞掌珠喜見瑞光浮家聲有紹惟楊震
天道無知只鄧攸賀客每傳詩志喜誇人不用酒消憂
他年好紹箕裘業才俊當推第一流

津津喜色上眉頭
賓主持盃互勸酬
有酒何煩說疊恥
無錢安用效囊羞
應門豈比李泰伯
生子當如孫仲謀
欲驗寸心窺造化
百年春雨長松楸

意令與國助租丁
自是承宗德澤馨
祥鳳已知生鸞鷟
小蟲何必負螟蛉
陽回氣候生鄒律
春藹芝蘭滿謝庭
父子祖孫傳百代
此心安用測沈冥

五言排律

和呂德昭春日遊問政二十韻

仙家白雲裏水複更山重已化雙飛鳥空傳九節筇石
函藏秘訣寶劍瘞銛鋒境勝華陽洞形高天柱峰尋真
何處問學隱此情鍾阮肇留遺事劉晨覓舊蹤珮懸青
玉鏤丹熟紫金鎔呪法能馴虎輕身可跨龍蟠桃開蓓
蕾芝草長丰茸日月同駒隙乾坤等蟻封蓬萊知路永
閬苑得春濃鶴老應摧羽魚潛不露喙唐詩存古碣秦
爵授枯松樹穴穿飛鼠巖空集稚蜂生涯從澹泊景物
自從容頗覺遊多趣何煩悶少悰石香炊飫軟泉冽釀

醅釀自有逃名志寧無學古胸踈狂李太白風致郭林
宗羨子能行樂來歸日下春

和劉通判贈人刻圖書印韻

剪刀知漢篆符刻是秦書磨礪形模小雕鏤字畫踈絕
憐新製巧豈識古文餘印白纖痕滅涵朱淡色除售求
增貴重貽贈感勤渠素璞剜難就黃金鑄不如傳家稱
舊物好古屬貧居經史煩明證篇章任卷舒牙籤標李
泌藻翰記盧琚攜貢玉堂署相隨賦子虛

七言排律

題醫士朱士良紫陽讀書卷

結屋紫陽山下村，承家今喜見文孫。
方抄已積三千卷，書讀須窮十萬言。
緇帙芸香蒸雨潤，石爐藥氣散烟昏。
杏林手種陰功茂，雲谷心傳道脉存。
龍虎煉成能自衛，蟲魚註就許重論。
莫辭此日辛勤力，要使他年學術尊。

又

流水淙淙撼石梁，紫陽當戶挹嵐光。
何殊講習居長白

自說流傳屬太倉藥品君臣儲滿籠書籤今古積連床
螢囊照眼能供讀龍化為人欲問方坐愛茅簷隨月色
病思橘井湧泉香良醫良相真何異好拯生民濟世康

梧岡集卷三

欽定四庫全書

梧岡集卷四

明 唐文鳳 撰

七言絕句

題太常寺丞呂仲善寄弟仲鉉雙雀圖

啾啾雙雀曉風寒
花到酴醾春事闌
應似鷓鴣原急難
意蕭條不是紇干山

題無心道人墨竹

一江踈雨翠烟迷
愁結寒雲楚甸低
猶憶泊舟蒼石岸
黃陵廟下鷓鴣啼

鐵網何年出海波
玉根此日迸江莎
重華不返蒼梧遠
愁絕天寒雙翠娥

題孤鴈圖

當年曾讀鮑當詠
此日欣觀崔白圖
紫塞月寒憐影暗
黃蘆風急想聲孤

題東坡赤壁圖

堪笑黃州禿髮翁江山詞賦兩爭雄至今千載留圖畫
良夜扁舟一鶴東

題畫牛圖二首圖有翰林滕王霄留題

三年出宰勸勤耕穰稔西風秋雨晴從此牛閒飽豐草
可無留犢慰民情

犢飽眠雲倦不行平沙過雨草初榮玉堂亦有歸耕志
牛背青山一笛橫

題太常寺丞呂仲善寄弟仲鉉雙鴈圖

黃蘆葉颭晚風輕何事離羣獨自鳴雲濶天高行已斷
江湖遙憶弟兄情

題道士王貞白小像

碧水丹山物外春瓊樓玉宇絕埃塵不隨跨鶴吹笙去
猶作華陽洞裏人

題墨梅

嫩條枯幹著疎華曾訪林逋處士家放鶴孤山秋夜永
娟娟明月照江沙

題馬麟桃竹圖

翠竹緋桃近水濱
杖藜應是避秦人
緝熙殿上春光永
豈識青城月色新

題懸崖蘭竹木石圖

懸崖石罅托孤叢
冉冉幽香拂晚風
忽洒一枝湘雨濕
平生心事喜相同

九畹如何不託根
却從孤石寄香魂
鳳歸來啄琅玕實
留得青山月一痕

平生不肯汗秦鞭來伴湘江二女仙
千古忠魂向何處御風綬佩尚泠然

題玉堂學士圖

硯池波暖墨蛟腥睡起揮毫手不停
天上玉堂春晝永明朝宣旨寫蘭亭

題梅竹圖

翡翠烟迷葉底寒瓊瑤雪積樹頭乾
小橋流水人何在猶照孤山月一團

題層巒積翠圖

疊巘重巒翠欲流
雲藏古剎倚巖幽
上方鐘罷僧歸晚
古木寒泉十里秋

題林下讀書圖

林下風流老隱居
心閒謾讀數篇書
催科政拙何能了
野鶴孤雲媿不如

奉題徽宗御筆十八鶴圖

仙姿何事擬登瀛
不戒乘軒百感生
千古青城空月色

可憐無復九臯鳴

題烏騅圖

黑雲不散護龍身
墜地房星夜有神
只恐健兒羈未得
瀟瀟風雨欲生鱗

題畫馬

手控柔韁洗刷闌
曾經渴飲九河乾
太平無事邊塵靜
好入君王十二閑

鬃振蹄奔勢欲馳
斫餘豐草搶頭低
平坡樹影涼如洗

却憶瑤池月下嘶

題折梅花

墨沼移春春不知
却將玄色換仙姿
小橋流水孤山路
呼鶴歸來月上遲

寒風吹入硯池波
疎影清涵春意多
月白羅浮香夢醒
飛來青鳥夜如何

送金仲遠調大同衛掾

三月東風吹雨晴
龍灣江上看潮生
潮生潮落自朝暮

不盡鄉人離別情

我留子去意悽悽
匹馬長途獨向西
若到鴈門關外望
故鄉回首白雲低

寄縣丞魏尚質

一緘書寄見真情
令我相思雪髮生
語寂空庭閒白晝
滿簾槐影日微明

溪上青山城上樓
相思雲樹意悠悠
西風鴈叫江湖遠
明月蘆花千里秋

寄主簿高泰銘

高適能詩五十過文孫才德藹春和三年小試勾稽簿
處處桑麻雨露多

寄龍南知縣劉誠忠

平生特達劉公幹老去栖遲唐子西三載情懷若膠漆
一時踪跡異雲泥

艤櫂相逢鐵索灘沙頭風雨一罇寒別離幾度思君切
倚遍重樓十二闌

謝平川耆民鍾尚義寄鮓

味如膾雪色如霞
遠寄包封道路賒
酒醒夢回涼雨過
不知身世在京華

真情不減孟宗寄
廬譽何須羊續懸
萍雨荷風生酒興
夜闌飛夢到平川

芼以辛薑添美味
沃之苦酒吐奇光
冰盤碎切飛霞片
采石罇深入醉鄉

甕潭昔有銅環鯉
何事而今碎雪鱗
慰我老饕尚能賦

詩瓢酒杓細分春

彈缺王門食有魚寄來磁甕更鮮腴謝詩媿非裏鮓帖
贈遠當傳雙鯉書

寄孝子呂叔素

相傳禮樂太常家市隱城南靜不譁兄弟怡怡自和輯
春風庭院紫荊花

廬墓三年孝行全姓名已達九重天蓼莪應念劬勞德
彤管當書史一編

教子傳家守一經百年文獻舊瓊青
雄辭妙畫南金價
磨石當鐫太史銘

寄生員徐永德

明倫堂下竹疎疎
枝葉蕭森涼雨餘
滿目塵囂俱洗盡
夜深吹燭照殘書

寄鍾子常文學

紫髯才俊總超羣
筆底春生五色雲
千里相思共良夜
東龕巖畔月紛紛

龍潭酌別惜攜分酒濕淋漓白練裙何日相逢共傾蓋
寸心長繞湫江雲

天上宏開白玉堂老臣侍讀沐恩光拔茅連茹思才俊
東野雲龍願頡頏

妙畫清詩才思新笑談頓使座生春白頭媿我鸛鷺侶
青眼思君鷗鷺羣

陽山東望起朝霞富貴功勲越國家秋色可憐今寂寞
獨留黃菊一枝花

寄秀才羅季翔劉德明劉志用陳克讓王達禮

方文興鄧子民楊汝誠

我來子去各東西蹤跡何殊鴻印泥座上春風誰許挹
滿庭棠影鳥空啼

師席長虛知幾年雨寒塵暗廣文壇揚雄已老侯芭去
寂寞何人守太玄

寄徐復本主簿

白髮臞翁特寫真風霜骨格雪精神鶯花故國十年雨

鸞枳當時百里春

寄楊南壽

關西夫子道尤尊
清白傳家到耳孫
幾度相思程水路
白沙翠竹月當門

僦居近住古城邊
大隱如何在市廛
雲散西山青似洗
踈踈涼雨洒簾前

寄黃子成

每愛西江雙井黃
食蓮念母寸心長
東隣舅氏年將老

相見何煩憶渭陽

載酒龕巖飲石坡危橋搖兀步難過至今夢想何由到
心逐春風繞薜蘿

題墨梅

前村昨夜雪晴時春到寒花第一枝錯認孤山小橋路
月移疎影鶴歸遲

東風吹春到南枝三花五蕊香參差幽禽戴雪頭已白
月明忍凍應多時

題紅梅

春沁南枝雨未乾
東風吹暖已消寒
何人點染胭脂裏
疑是嫦娥絳雪丹

題畫

斷磯石罅兩舟艤
繁木雲邊孤館藏
有客讀書忘俗慮
綠楊風軟日初長

落落長松蒼幹古
深深幽館碧窓虛
堦除近水鳬鷺集
知是山中曉雨餘

題宋李綱帳綠亭詩後

狡童已沮勤王志老檜猶貪蔽日陰
帳綠春深風雨橫
一生空負老臣心

環珮重來軒為槐塘程文實賦

當時丞相七絃琴尚有高山流水音
今日猶能存手澤
祖孫相繼百年心

何年斲就嶧陽桐律呂音諧指下工
相業當時勤變理
心同虞舜鼓南風

相業相傳祖澤存至今厚德說高門
遙知府第多清思
三弄梅花月一痕

敬蒙書賜梧岡二大字伏覩八法精妙超入神
品寵榮所及不勝喜慶十襲珍藏永為家寶謹
賦詩謝恩

頒賜梧岡翰墨香錦箋字字響琳琅
山林若候藏書處
午夜晴虹貫月光

詠睿筆畫蜂

報衙課蜜日飛忙競採羣芳浥露香
睿筆寫生同化育
上林隨處駐春光

又

午衙初報往來飛採得花香兩翅歸
微物亦蒙歸睿思
君臣誼重識天機

謝賜睿書

清思臨池白晝長金箋揮灑染龍香
侍臣得賜琳琅字
奕世相傳被寵光

鸞翔鳳翥精神異虎卧龍驤氣勢雄若候藏書占太史
九天光燄貫長虹

詠馬

房星天駟夜凝神光照祥雲散滿身十二閑中知第一
草豐沙苑早回春

龍馬由來產渥洼驕思顧影自矜誇太平天子東封日
五色成羣雲作花

奉賦清曉詩

日色瞳矐曉氣寒風生仙仗露華乾封章啟讀清朝早
身在蓬萊玉笋班

謝賜睿翰神妙變化遠法鍾王臣子儀不勝欣
躍賦詩以進

睿思筆力掃千軍寫遍金箋五色紋墨沼鸞飛光掣電
天門龍跳勢騰雲

又

清興閒書筆陣圖妙窺八法不須摹鍾王墨跡何堪數

摘得驪龍領下珠

又

臨池清思日初長
龍劑香生玉楮光
八法精深入神品
侍臣蒙賜永珍藏

奉賦秋涼詩和陸長史韻

金井梧飄早報秋
星流大火暑全收
人間爽氣清如水
涼滿山家十二樓

奉賦對月詩和陸長史韻

風掃浮雲淨碧空
秋蟾皎潔出天東
賢王心鏡清如水
一照光明萬里同

雜體

送張守正歸句容故鄉

啼鳥行

慈烏啼聲何悲聲
悲情慘風淒淒
昔時孤雄引雛飛
雛飛雛飛遠去羽翼齊
可憐流落天之涯
孤雄摧折嗟命違
天荒地老歸無期
雛生未報返哺慈
霜寒永夜長相思
慈

烏啼聲何悲爾何不往故林栖中有喬木連雲低願因
晨風送爾歸空巢補葺哺其兒不受風雨漂搖危

鳴鴈篇

鴈鳴嘹唳穿雲飛秋風吹老黃蘆枝江南江北九月時
水田菰米食可肥平沙漠漠羅網稀年年飲啄忘禍機
南天月色無光暉孤鴻行斷摧翅垂翩翩不下洲渚非
思鄉旅客情依依幾回緘書煩寄之鴈雙欲來胡不來
今年與客同春歸

茆山歌

茆山三峯瘦於削拔地剡天起巖壑茆家兄弟已成仙
翩然欲下騎丹鶴瓊宮琳宇相參差靈芝瑞草何巖巖
羽衣或跨黑虎降玉印曾獲白兔窺可憐桑田變滄海
依舊三峯森翠靄山中有客久出遊孟浪不歸今幾載
昨朝青鳥傳雲書招邀好覓烟霞居白石炊香凝雪粒
黃精釀熟浮玉蛆颺車忽乘歸興速茆山之歌已終曲
慇懃為我謝茆仙丹臺許註長生籙

洞天曲

天下洞天三十六
茆家兄弟來
句曲至今虹光貫斗牛
藥爐九轉還丹伏
三峯直走如驚龍
落日倒射青芙蓉
剛風吹老瓊花折
書傳雲錦來金童
功成寄語遠遊客
好訪山中一區宅
歸來管領舊烟霞
長嘯數聲秋月白

黃山謠

黃山之高高倚天
三十六峯含紫烟
秋空浸月開金蓮
浮邱容成久飛仙
至今尚湧硃砂泉
二仙一笑三千年

海枯石爛陵谷遷蓬瀛嬉戲何時還丹室空闕青瑤編
猿吟啾啾鶴翩翩山靈誰主空淒然句曲有客拋塵緣
卧雲歲久志益堅御風復返三茅巔下視齊州九點烟
送鮑仲嘉省親詩

望雲篇

朝登崇山言策其馬白雲孤飛親舍在下望彼白雲悠
悠其思思親云遠曷能來歸浮雲在空變態無跡吁嗟
季子滯于行役昔之未返憂心孔殷今爾既還笑語訢

訢有斑其衣有白其髮再瞻再拜慰爾契濶躋彼堂矣
稱彼觴矣親之康矣樂無疆矣

遊子吟

朝為遊子吟暮懷遊子悲遊子去日遠慈母將儔依母
髮白如雪子心皎如月但得子心如月圓照母白髮高
堂前

彩衣曲

彩衣兮般般遊子歸兮慈母歡彩衣兮楚楚遊子去兮

母心苦遊子去兮離憂多母心苦兮將柰何

樹萱吟

樹萱北堂祀翠葉何歲隄深沾雨露恩恐遭霜雪萎昔
年初種時短短根在土今年已著花蕊擘金釵股花開
僅十日親壽期千春常懷歲月邁未報鞠育仁誰言可
忘憂離憂轉如積臨行繞萱叢露濡彩衣濕

占鵲辭

北堂靈鵲聲喳喳下堦自銜萱草花慈母倚門每占喜

定想行人歸到家昔時苦被鵲聲悞臆對含愁如欲訴
今日鵲聲知有準驚去回翔仍返顧東家郎君不出庭
別離那識過平生縱使今朝競喧噪有耳何曾為爾聽
西家農夫在田野恬熙生長茅檐下幾回著意送清音
聒亂生憎遭唾罵惟有慈闈白髮親屢卜佳聲秋復春
溫清疎違甘旨缺而今喜見速歸人丁寧靈鵲莫飛去
深栖只向堂前樹上無鷹鷂下彈丸每聽流聲慰愁緒
行人既歸爾相宜行人又去爾不知但當愛身慎飲啄

他年再報歸來期

烏夜啼和韻

遶樹三匝烏擇栖風清月白
呶嚶啼閨中惱殺無家女
時時臆對含愁語拋鍼倦繡
減蘭燈臉褪鉛花墮紅雨

關山月

秋月生寒山照妾空幃間
忽起遠道思良人守秦關
近聞更移戍舟上瀘河灣
迢迢各千里相望何時還
盛年嘆零落覽鏡凋朱顏
妾心徒自悲月色長自閒

樹中草

野草附樹青蟠根空穴裏雖蒙雨露濡柔葉易枯死嗟
爾亦何情失地猶貪生不如培厚土芊芊自欣榮

短歌行

日月苦短短倏忽百年滿古今浩茫茫慷慨萬感長不
如飲美酒驅愁消鬢霜勞勞塵世內沉醉知幾場有子
力耕稼有婦供蠶桑口吟白紵詞手把黃金觴哂彼輕
薄兒車騎誇輝光

陌上花

陌上花開春日遲
臨安女兒緩緩歸
花開容易辭故枝
緩歸只恐恩愛違
人生幾何成老醜
勸君且盡一杯酒
願君善保千金壽
夾馬祥光盪牛斗
滿目江山復何有

綠水曲

綠水不見底
水深情更深
中有比目魚
同目復同心

洛陽陌

看花洛陽陌
春色上衣來
但使花長好
不肯放春回

靜夜思

舉頭見明月萬古月不老月圓人亦圓人月應同好

相逢行

相逢不道遠相見即言歸高堂春晝永好待舞斑衣

玉階怨

夜深白玉階露下寒侵骨娉婷不敢行恐踏團圓月

上東門行

上東門在何所河陽城南瀍河澍舊時豪華今已空惟

有當年一杯土聞說漢家全盛秋門前列第皆王侯朱
輪翠轂日來往凝笳疊鼓長喧啾畫簷雕拱接宮觀十
里香塵飛不斷天上頻頒丹詔過民間屢免田租半白
髮老人不識兵間閭小兒歌太平鬪雞走馬尋常事宜
有紛紛愁嘆聲二疏乞歸章初上公卿曾此盛供帳道
傍觀者如雲屯雜彩從車幾千輛韶華轉眼流星過倏
忽荊棘埋銅駝逢萌掛冠固已矣石勒倚嘯將如何往
事傷心不能道惆悵東門何足保君不見北邙山頭四

五陵玉匣珠襦總荒草

七星石歌

永樂年間
取歸禁苑

不周山崩天柱折天傾西北形露缺混沌已分元氣裂
女媧補之母乃拙煉石五色生紫烟雲粘霞綴恐未堅
列宿參差自環繞璇杓耀芒安次躔後來星隕化為石
少陽少剛同氣質沉思應是媧皇遺暈映珠聯猶玃璦
何年下墜新安城砥平瑩滑常晶熒六丁呵護神鬼守
宵與人世鐫碑銘移來獨在萬山頂安置琳宮秋月冷

步虛聲歇剛風吹瀛海神遊夢初醒揚州道士騎鶴仙
幾迴朗誦黃庭篇簪冠佩劍爽思襲激空浸水光相連
土花莫蝕埃塵淨劫火難燃離斧及甯戚扣角那能歌
秦人施鞭安敢運非產廬阜非太湖赤瑛為骨瓊為膚
煌煌耿耿三四點如此至寶寰區無好共茲山鎮悠久
夜夜祥光照穹宇不磨不泐千萬年留向瑤壇長禮斗

聯句

洪武三年十二月廿又三日喜文虎長兄受丞

江安之命自京使道歸省是夕張燈酌酒父母
在堂五兄弟次坐家嚴首倡二句相與聯詩以
紀家庭一時聚樂之情耳

禿頭憐父白老眼為兒青父山顯因人傑才超覺地靈
兄東湖徐穉宅西蜀子雲亭文鳳世守寒韁物家傳古
硯銘父三年忘窈窕隻影顧娉婷兄今日來儀鳳當時
拾聚螢鳳胡床知坐穩羌笛不須聽父世事風中燭人
情水上萍兄清名推善政舊業守遺經鳳莫壓陳驚座


猶思鯉過庭父恢恢存晚節落落嘆晨星兄蘇子歸巴
國申公出漢廷鳳便須花作縣莫戀肉為屏父書信憑
鴻雁原情相鵲鴿兄公門有桃李藥籠備蓼苓鳳村號
浣花曲橋題駟馬父無兒堪授業有女待歸寧兄故
里雲連屋長江雪滿汀鳳流光已健子種德必添丁父
飲酒思吞海為文學建瓴兄親情膠固漆時俗渭同涇
鳳栖鳥巢南越神鯢化北溟父家音報烏鵲燈喜綴蜻
蛭兄寡和成孤唱沉酣恥獨醒鳳義和稱速馭日月宵

雙停父奉養違甘旨棲遲感莢莫兄龍顏瞻近侍鶴髮
享脩齡鳳草長康成里松高御史廳父誰憐心似鐵自
嘆口如瓶兄柳眼春烟潤梅腮凍雨零金陵方返旆鄱
水又揚舲鸞瑟難膠柱牛刀試發硎

闕

文鳳遭家多難凶禍相仍今春二月聞長兄訃音
秋九月又不幸先妣傾棄文麟弟留滯廣西三載
未歸久絕音耗未知存亡偶閱故篋得此詩舊藁
不忍遺棄追思曩昔父母俱存兄弟無故一時倡

酬之樂不可復矣嗚呼昔日未知為難遇今而履
此始知其為難遇曾子所謂孝有不及悌有不時
信哉斯言因錄於此涕淚危迸悲痛不能禁耳時
洪武十二年臘月九日文鳳謹跋



梧岡集卷四

欽定四庫全書

集部
梧桐集卷
五

詳校官編修臣翟槐

中書_臣劉源溥覆勘

總校官進士臣楊懋珩

校對官助教臣胡予襄

謄錄監生臣馬步蟾

欽定四庫全書

梧岡集卷五

明唐文鳳撰

序

送張都司移鎮大同序

永樂二年春滁州衛指揮同知鳳陽張公大罷移鎮大同
瀕行一時僚屬以公平昔教閱經歷之地曰環滁皆
山曰琅琊深秀繪為圖以餞復予言予曰公之才畧

器識誠無媿於古之名將矣然記曰儼人必於其倫予嘗觀公之世系而得一人焉宋之張魏公始官熙河徧行邊壘覽山川形勢詢守邊舊法由是悉知邊事又嘗視師江上屯兵淮泗忠君愛國始終一念功烈之盛為中興名臣首今而較之大器淮泗之與滁陽何其地之接也熙河之與大同何其境之聯也督府之與都司何其職之近也苟因其迹而求其心則清河之宗繼魏公之遺躅非公其誰也予故期公以遠者大者略圖餞而

詳魏公豈泛於擬倫哉

武夷圖序

衡陽為南嶽南方諸山皆其支脈而閩之武夷雖神剝
鬼鑿有不得其巧山皆石少浮土其色蒼紺或如登豆
或如盂盆或上銳而中小或面正而背欹嵌嵌而為巖
空虛而為洞深為潭為淵高為峯為巒靈淑之氣物產
不足以專之必泄而為英賢乃可當也我齊國文公嘗
愛茲山之勝而卜築焉雲谷有草堂滄洲有精舍擢歌

聞乎九曲註易存乎一爐遐想平生過化之所一草一木被其光華一泉一石沐其膏馥其留也山雲亦為之喜其去也猿鶴亦為之怨非文公之幸也乃茲山之幸也公七世孫朱公伯善結屋於山麓今官新安去鄉日久浮嵐濕翠不得目挹而手攬之乃為圖裝演成軸以釋其故居之思間俾予叙於左方予曰公之圖非慕山也蓋思祖也文公之道與山同久文公之名與山俱存觀山則儼乎若厥祖之著存於心也然則公不惟觀乎

山而惟思乎祖乎詩曰無念爾祖聿修厥德公當持身
修德以繼其家聲圖畫云乎哉遂書而叙之

吳氏族譜序

氏族者古史官之所紀錄故司馬遷父子約世本修史
記因周譜明世家厥後唐太宗詔高士廉等作氏族志
宋歐陽文忠公依漢年表為世譜姓氏之所出其來遠
矣家之有譜猶國之有史也史立法簡嚴非殊勲偉績
穹爵盛名則畧而弗書譜載事詳明為子若孫苟其祖

父一言一行之懿惟恐或遺然則家譜者所以佐國史之不及也嗚呼譜牒之不修也久矣汾陽四世而冒認黃渥七世而復合則知姓氏之所自出皆係於譜而不可以不修也星源富坡吳氏為泰伯之裔傳世八十有九粲然如珠之就貫整然若鴈之列行先後有倫小大有序昭穆之名支派之衍可指而易見也蓋由梅巖翁用心之篤能因其舊譜而重加訂正詢諸耆舊稽諸載籍旁搜遠引上接下基無所漏失可謂勤矣昔梅巖之

長子尚友常徵我先君白雲翁序之今尚恭又能因其
父梅巖之所修而求儒林名筆以繼父之志以顯祖之
德而傳示於無窮者亦可尚矣嗟夫世之人肯構不能
肯堂前橋不能後梓矧若吾尚恭父子同志而能以尊
祖敬宗之心為心俾後之子孫知祖訓之是式祖德之
是徵則修身慎行無忝所生豈不由茲譜之存歟詩曰
無念爾祖聿修厥德序以弁於卷端云

龕巖十景詩序

龔巖去治之東十里許按越國公家傳即公講學所也
山亘石無土少草木間有小木垂羅雜草一皆托根石
罅而生冬夏亦不枯地氣稍寒日光所不照雖盛夏陰
風淒然巖形穹窿豁豁中空洞可容數十人兩山開列
橫濶五尺許澗水中出清澈寒碧近巖底水激射深不
可測自源口披灌莽小徑縈紆迴折至是以小舟筏渡
乃可到巖前有石坡二鑄鑿累級若階梯然登坡至巖
架以危橋步之搖几下視深壑無底使人目眩心悸巖

下有石形覆而長類舫有潭形圓而泓類甕有泉交互
流注若索有峯森銳特出若筍飛流直瀉者瀑布危峯
排列者筆架神鯉帶鰲令公所放生刻石試劍令公所
遺跡供佛有剎讀書有巖此東龕之十景也予嘗讀唐
史列傳宰相世系表越國公名紹京魏太傅鍾繇十七
葉孫多蓄墨跡工書唐之宮殿明堂九鼎皆公筆也後
以平內難功拜中書令封越國公迄今七百餘禩其苗
裔蕃盛徧溢於江右郡邑嗟夫公立志之高嗜學之篤

乃能探幽處獨違世絕俗故得抗其志成其學收其駿
功流其令聞蓋一代偉人也予宰興國三年景慕前修
嘗欲一遊而未果今丁秩滿事隙公裔孫耆儒鍾子常
重飾公遺像留度巖中請予尋訪復干賦十景詩以傳
於後予喜而賦之同遊者長史張彥通也

靈山二十景詩序

南嶽衡山在古荊州之域周迴二千餘里屹然七十二
峯而江南之山皆祖於衡嶽也騰蹕起伏盤旋拱揖如

龍形之矯矯蟲足之跂跂虎踞而蛇行鳳飛而鵠立千
態萬狀奇勢異蹤莫可窮詰延袤綿亘突起而為崆峒
之山在古虔之封為江右諸山之祖也聚而為府治散
而為屬邑支縣脈貫乍隱而復見欲斷而更連踴躍走
五舍駐於興國縣羣山外環平川中豁據震艮之位有
靈山焉兩崖壁立夾水為澗小徑縈紆羊腸九曲俯卑
而窺高穿深而度密是以層峯疊嶂其勢嵯峨而嵌嵌
頑石懸崖其色蒼紺而黝黝怪特詭秘神剗鬼鑿心駭

目眩並難名狀也尤難摹寫也不知天造地設鍾英孕秀於是歷幾千百載矣山多勝景莫能殫述而擇其顯著者得二十景自山之麓至其巔沿途多松清陰覆苔類引行人曰引路松於半坡翼以一危亭白雲吞吐隘若關險榜曰雲關亭入源口當寬夷處峯回水繞原田古木題曰碧環亭傍陰崖下累石為龕厭世長逝火浴風化號曰化僧亭近寺有橋橫澗有屋庇橋夜月娟潔秋波澄澈名曰水月亭奇峯五各以形肖名左蹲伏獅

子草生石面風吹冉冉猶毛披然右峙垂象鼻烟抹崖
頭霏霏漠漠猶氣噓然圓而仰者香爐圓而覆者鉢盂
銳而長者石筍玉珠有泉懸流點滴如珠在貫疑鮫人
之泣也仙女有潭竅石空通如壺注水知龍公之宅也
有二巖虛洞類屋範金為觀音像度置其中危峭百尋
必釣繩以引則人可到也剽然欲睡隱然欲伸石曰伏
虎使李廣卒遇之則射而沒羽也偃規而就矩稟地像
之形扶疎蔥蒨為方竹林厭紅而棄青鍾商顙之色秀

異娟淨為白蓮池弘敞其門不二於道揭以歸一陰翳其洞不褻於暑名以芭蕉貼危架險有橋幽幽浮光涵影有池湛湛此勝景之得名而可詠可述也予叨承上命出宰斯邑庶務叢脞臨政無暇固不可效昔人遊山飲酒賦詩而廢事也嘗聞韓子留華陰登山陁而覽眺柳子居永州記山水而遊適然則古之賢達未嘗不寄情於山水景物攄幽發粹搜奇抉隱見於文章以傳於後世予雖不敢繼韓柳之聲光至於吟倡記著亦竊有

志咕咕然動其喙矣奉陪府判周公同遊命予即席賦
二十景尋陪知事黃公再遊亦有題詠三年春南安大
庾邑庠生蔣文學留斯邑知其勝特欣往焉予不與俱
而錄予詩囑工畫者圖之復徵言以序之誠愛茲山之
勝茲遊之樂欲久而弗忘也故不辭而書之

息馬觀書圖序

古之名將息馬論道投戈講藝故能立功勲而銘彝鼎
留聲譽以書竹帛若萬人敵百夫勇固足以叱咤風雲

戰勝攻取而赫然一時矣然不學無術或利心勝而不知所以慎其始或驕心生而不知所以善其終往往取顯戮以為天下笑幸而免焉亦君子所羞稱嗚呼道義不明尚功利而矜詐力知此者鮮矣新安衛鎮撫王君仲禧性敏好學蒞職以來簡閱士卒融之以恩臨之以政糧餼充足鎧仗鮮明時論稱之嘗於暇日闢小軒蓄書畫數會賓友討論經史探研韜畧玩理以養其心集義以養其氣乃命寫所居之景為息馬觀書圖謁儒林

之士嗷咏之屢徵一言以序其端遂告之曰文武豈殊途也自姜武成王著書立言世以陰謀目之然未嘗不以仁義道德為說丹書之訓凜然王者之師其垂名宇宙而百代尊崇者不獨為兵家之祖實以敬怠義欲之戒允為心學之宗也張留侯之所授受李衛公之所問對皆得其糟粕耳亦足以開漢而興唐至於綸巾羽扇指麾三軍如武侯者靜學之妙超然心得則庶乎近之矣此所以為三代以上人物也嗚呼夾谷之會吾夫子

謂有文事者必有武備然則介冑之士固當以仁義為
干盾而章縫之儒亦豈可諉軍旅於未學而遂厭之哉
今仲禧息馬觀書作圖自礪將見造詣日高涵養日粹
才畧日充事至而不惑功成而不居詩書謀帥者必不
能舍之矣故序以歸之俾書於圖之左方以俟

題端孝思草書引

往年予成童時常造棠樾鮑氏之南軒石泉周先生講
道於是執經坐上座者有端氏二子焉其尊府君以善

公為徽郡幕賓以方正廉能稱愛子使之勵志於學長
孝友純粹篤厚次孝思聰明才俊予雖未解事心竊識
之矣弟昆婉美殆猶機雲入洛璩瑒在魏也厥後侍宦
游江西留南京一時諸閣老相與磨切學益進名益高
信乎其為儒林之英也邇來寓清江杜門息慮肆志翰
墨人購其片紙隻字藏以為寶予友汪致達伏謁門下
求得是卷予屢觀之有存筋藏鋒之妙有驚蛇迅鳥之
勢體備諸家筆兼衆長闔芝靖之庭入羲獻之室至於

旭之顛素之放可以嗤笑也翰林危公太樸嘗評之曰
端孝思書如謝家子弟自是芝蘭玉樹光彩照人懸腕
之法世能者稀俛仰古今不覺專擅其相推重如此亦
可謂知言矣昔陳無已送蘓長公有一代不數人百年
能幾見之嘆矧予與孝思幼雖心知長則契濶相隔千
里莫獲一見而草法為當今名筆捨吾孝思幾何人哉
宜區區之嘆有甚於無已也其慕蘭之心益增耿耿耳
予故歷叙其概畀於卷首俾永葆之以傳示於無窮也

御製欽人鮑壽孫孝順詩序

臣聞孝為百行之原天之經地之義民之行也是以通
三才序五倫孝之道大矣上古帝王惟虞舜稱為大孝
以聖哲之德化頑嚚之親下至武王周公以達孝稱洪
惟我聖朝太祖高皇帝膺龍飛九五之運臨御華夏以
孝動臣民俾家為孝子人為忠臣比屋可封蓋所以移
孝為忠以盡臣子之職分而無愧唐虞三代之治矣欽
惟太宗文皇帝應天順人紹承正統能以太祖之心為

心克篤純孝而聖德神功巍巍赫赫極天所覆極地所載洋溢周徧浹洽寰區迺於孝陵建立穹碑國史纂修實錄皆孝誠之大者也萬機之暇博采古今孝順事實親書宸翰撰為詩章得二百七十人版行於世頒賜臣民以為昭鑑示天下取法焉而歛人鮑壽孫亦蒙褒寵臣按宋史孝義傳所載鮑壽孫與父宗巖當丙子之變盜起里中父子俱被執願相代死賊猶豫未忍殺俄有風起叢薄間若車馬聲賊疑官軍至皆走散父子俱得

免人以為孝感之報遂稱為慈孝鮑家今大明聖朝又
沐御製頒示四海臣民以為矜式猗歟盛哉先賁泉壤
澤及九原抑何幸歟嗚呼天人之理報施之道猶合符
節無毫髮爽當其父子爭相為死一念之萌動天地感
神明而秉彛好德之心古今一揆是以承兩朝之恩寵
百世之光榮為不可及矣昔其曾祖鮑仲安翁於元時
宋史新成厚貲購之裝演成帙以遺其祖南季藏為家
寶今其孫榮相又抄錄御詩成集以貽永久亦可謂能

紹祖宗之傳而不忘先德矣嗚呼賢哉臣以四朝遺老
賜歸田里恭覩朝廷之盛典由是不揆愚昧而効揄揚
頌美之萬一云

贈進士童孟韜興復朱文公家廟序

道之大原出於天天不愛道而賦於人任斯道者寥寥
數千載幾何人哉自孔孟歿而斯道不傳至宋周子出
不由師傳而獨得於天二程子承緒而倡明之一傳於
羅豫章再傳於李延平三傳而至我朱子集諸儒之大

成繼往開來大有功於斯道也徽婺源有方山綉水之
勝乾坤清淑之氣所鍾篤生賢哲而為朱子桑梓之邦
昔常齋吏部尉尤溪而生朱子于尉廨遂家於閩婺源
故居鄉人敬慕久而不忘乃為立家廟於遺址而祀其
父子焉由宋逮今興廢不常當元盛時干侯為州飾廟
宇虔祀事而歛人鮑仲安捐貲贖田歸之廟虞文靖公
記之此一興也洪武間予與其裔孫汝達勸率闔郡官
僚士庶捐貲重修此再興也洪熙乙巳朝廷以纂修實

錄選差進士童公孟韜採訪永樂事蹟以成國史之紀
述公歷婺源謁拜家廟棟宇撓折尾髯解散上漏旁穿
不蔽風雨顧瞻傍惶乃謂衆曰朱子之道如日行天後
之人誦其詩讀其書可不知其人乎於是邑之長佐耆
老儒士感發趨事撤而新之規制踰舊趾翼翬飛城市
改觀溪山出色而朱子在天之靈神游故國必當陰翊
默相而文運之興可待也其有功於名教何如哉予雖
老於公之行也竊為吾黨致謝私焉是為序

東臯十景詩後序

晉陶淵明為一代清節之士嘗曰登東臯以舒嘯又曰
種苗在東臯夫東春方也臯春澤也大抵人情樂氣候
之融和景物之明媚故適興者必於是力本者必於是
而淵明之清趣則殆超塵寰而獨立矣廬陵郡城東北
之地有東臯焉負山而瀕水峯巒之峙列林木之蒼蔚
洲渚之縈迴湖江之浩漾春秋朝暮之異時風日雨雪
之變候仙宮釋廬之雜處寒花涼瀑之分秀誠幽人逸

士之所擇而棲樂而遊隱而耕者也好事者從而名之
以十景焉張思恒氏築園結樓以攬其勝於是賓客之
宴會士友之游息殆無虛日而所謂十景者可眺可玩
可歌可咏徜徉容與寓興其間而心與造化謀蓋將游
廣漠之野而之無何有之鄉天壤之內有此真樂而思
恒獨得之矣嗟乎有此宇宙則有此山川有此山川則
有此人物浩乎已往茫乎未來苟不托諸文章形諸篇
什則何以彰今而垂後耶淵明諸作迄今令人歆美即

其地感其景讀其詩思其人裴徊俯仰有不可及之嘆
昔蘇長公以東坡自號而盡和陶詩識者謂淵明千載
人東坡百世士出處雖不同氣味乃相似思恒振遺音
而紹絕響使二公之高風不落莫於千載下而東臯之
景益增其勝顧非山川之幸歟予因思恒請既序其槩
復書十景詩以綴於後

竹坡詩序

海寧之東有地曰首村環山外拱平原衍沃朱氏廬聚

於斯其彥德昇甫新闢一軒以為藏修之所軒前有坡
隆然而昂偃然而伏種竹數十百箇因以竹坡自號其
子澤童以俊茂充弟子員從予姻友呂德昭游德昭為
致其父命以徵予言予曰竹草木類耳天地間萬彙芸
芸可喜可玩者非一而何獨竹是嗜德昭曰吾嘗登坡
而飲刻竹而吟與聞其畧矣時雨沐之萬枝翠色則四
時皆春曉風吹之萬葉清聲則四時皆秋天地之春成
功已去而一坡之春未嘗去也天地之秋循序已歸而

一坡之秋未嘗歸也朱氏父子嗜之固宜予曰春容可
以寓目秋聲可以適耳不過耳目之娛而已更有進於
此者乎德昭曰德昇進學不倦而澤童日受庭訓以竹
自警見其材而思何以達吾材見其直而思何以成吾
直見其虛而思廓吾量以大其受見其操而思勵吾志
以貞其德殆非徒為玩好也予曰是可與言學矣衛風
淇澳之章詩人形容武公之盛德必起興於叢竹之猗
猗聖人取以為經而大學引以釋傳德昇父子苟能切

磋琢磨以進於瑟僖赫喧之美則竹坡之名一日聞天下而傳後世顧不偉歟澤童將求儒林善於比興者歌咏之予為再歌此章一倡三嘆遂叙次所言以弁於卷端云

城東許氏族譜序

夫混沌既判而兩儀奠位人生其間參為三才以立人極當夫人之初開生齒未繁而姓氏猶簡惟有六姓伏羲姓風倉頡姓高祝融姓龔神農姓姜黃帝姓姬太子

雷姓方繇三代以降人文日宣生齒日繁天子建德因
生以賜姓胙土以命氏有以帝王名號為氏有以王父
字為氏有以土為氏有以國為氏有以邑為氏有以官
爵為氏有以鄉亭為氏有以伎物為氏有以因功而賜
姓有以外域部落而為姓有因過因事因刑而改有避
諱避仇避難避嫌而改其區分類別不可勝紀而所謂
以姓以氏以族者盖有不可不究者焉夫姓之為言生
也氏之為言示也族之為言聚也生者原其所出也示

者別其所同祖也聚者會其所同類也歷三五以降至於漢之西京金張許史四大姓為貴戚而許氏居其一也下迨唐太宗貞觀年間命高士廉等定天下姓氏為族氏志合九百七十三姓及唐玄宗勅定四海望族永徽六年乾封元年考定十姓為國柱十六姓為國梁而高陽許氏又為國梁之一也逮我皇明太祖高皇帝時翰林編修金華吳沉進千家姓凡為一千九百六十有八頒行於世而許之為氏蓋自許由始傳至周武王封

炎帝之後文叔子孫以國為姓至唐太子少師敬宗開
郡高陽傳十一世規公嘗羈旅宣歙間始置歙城東基
宇往來寓焉其孫會公因家於是卒葬歙南浦口金釵
塢其曾孫賓公遷歙北寧泰鄉因名之曰許村歷九世
孫七公宣義諱暹復居城東故址又傳七世孫淑明公
才行卓犖鄉里推尊郡人以八百年故家稱之其孫永
亨永禎二昆季克紹先志乃取舊譜質諸懿親東源張
本立重加錄集蘓明允所謂詳吾所自出也一日永亨

來徵予序予聞周禮周官小史定世系辯昭穆後世譜牒之學以為專門古者大宗小宗之法立則世系明昭穆叙自宗法廢始有不明不叙而先王之制盡矣嗚呼此有識君子嘗痛惜於斯焉今永亨之編尊祖敬宗而有志於睦族不忘水木本源之誼亦可謂賢矣使其子若孫知祖德而景慕之心油然而生益思修身慎行以迓先世之遺澤則所以增光此編者固有在哉詩曰毋念爾祖聿修厥德惟許氏子孫有焉故序其古今姓氏

之始及本宗之世緒以綴於編端

谿居圖序

歛西塢川其山自靈山之麓踴躍騰蹕危坡伏隴舒而為平原衍而為平疇前瀉大溪水漲則洪濤歛薄水縮則微波縈紆春則鷗渚瀰漫秋則鴈洲呈露紅蓼白蘋之掩映青莎翠篠之扶疎白魚跳雨翻藻而游泳黃鳥嘯風擲柳以下上天光雲影之徘徊嵐氣山色之杳靄輕颺旋而練帶皴霽月浸而水壺空樵艇之跡相交漁

歌之響互答坐苔磯而垂釣臨清流以賦詩此溪居之
景可唵可咏可圖可畫天然之趣也予老友朱士澤居
之專茲溪之勝而樂其樂焉司訓鄭以孝寫圖以遺之
王維之輞川莊李麟之龍眠莊殆相為伯仲也暇日士
澤訪予三峯精舍攜卷請叙予聞古之高人逸客逃名
遯跡必擇幽邃之地奇絕之境而托處殆將出寰中而
超物外忘身忘世忘人忘我不知千古之在前萬古之
在後如生鴻蒙之世而居逍遙之天無懷氏之民歟葛

天氏之民歟嗟夫杜子美之浣花溪嚴武載酒戴安道
之剡曲溪子猷乘舟張玄真青箬綠蓑林和靖寒梅白
鶴若士澤其神交四子而異世同心也歟予迺為之歌
曰天高兮蒼蒼地厚兮茫茫俛仰兮中處嗟若人兮壽
且康娛心目兮引興長溪居之樂兮樂未央無不足兮
奚所望溪流兮湯湯溪花兮幽芳朝夕兮尚羊栖吾身
兮水雲鄉悠然一醉兮傾壺觴叩舷高歌兮鏗清商鷗
暝鷺下兮機心忘忽驚起兮競飛揚蓬底夢熟兮秋夜

涼夢覺白鶴兮方南翔皎皎月明兮生東方歌竟士澤
撫掌大笑曰蘇僊騎鯨其音久絕響矣餘風未泯復得
再聞遺韻遂俾予揮筆書為序以附於卷云宣德四年
己酉夏五月朔八十三翁唐子儀書

梧岡集卷五